



SOALAN LAZIM

**PROGRAM SARINGAN COVID-19
BAGI PEKERJA ASING
MENGUNAKAN KAEDAH RTK ANTIGEN**

2 FEBRUARI 2021

1. APAKAH OBJEKTIF PROGRAM SARINGAN COVID-19 KEPADA PEKERJA ASING?

Program saringan COVID-19 ke atas pekerja asing dilaksanakan bagi membantu usaha kerajaan membendung penularan wabak COVID-19 di dalam Negara khususnya dalam kalangan pekerja asing.

Pelaksanaan program ini juga dilakukan selepas penilaian risiko yang dijalankan oleh Kementerian Kesihatan Malaysia mendapati risiko jangkitan adalah lebih tinggi dalam kalangan pekerja asing berbanding pekerja tempatan.

2. APAKAH KAEDAH UJIAN SARINGAN BAGI PROGRAM SARINGAN COVID-19 KEPADA PEKERJA ASING?

Ujian saringan bagi pekerja asing di bawah program ini akan menggunakan kaedah *Rapid Test Kit* (RTK) Antigen. Ujian ini melibatkan pengambilan sampel melalui calitan rongga hidung (*nasal swab*) yang dilakukan oleh petugas kesihatan terlatih. Pengujian calitan boleh dijalankan dengan segera di lokasi pengambilan sampel dengan menggunakan katrij yang akan mengesan kewujudan antigen virus COVID-19. Keputusan saringan melalui kaedah ini boleh diperolehi dalam masa yang singkat dan memudahkan pengesanan jangkitan COVID-19.

3. APAKAH KRITERIA KELAYAKAN BAGI PROGRAM SARINGAN COVID-19 KEPADA PEKERJA ASING?

Semua pekerja asing yang mencarum dengan PERKESO **layak menjalani ujian saringan di bawah program ini**. Setiap pekerja asing layak menjalani ujian saringan COVID-19 hanya sekali sahaja dalam tempoh program ini.

4. BILAKAH TARIKH KUATKUASA?

Ujian saringan COVID-19 bagi pekerja asing telah mula dilaksanakan di Selangor, W.P Kuala Lumpur dan Labuan, Negeri Sembilan, Pulau Pinang dan Sabah bermula 1 Disember 2020.

PERKESO telah meluaskan skop program ini di seluruh negara bermula 2 Februari 2021. Justeru, semua pekerja asing di negeri-negeri selain negeri di atas boleh mula menjalani ujian saringan COVID-19 di bawah program ini bermula 2 Februari 2021.

5. ADAKAH SEMUA PEKERJA ASING WAJIB MENJALANI UJIAN SARINGAN COVID-19?

Berdasarkan Akta Pencegahan dan Pengawalan Penyakit Berjangkit 1988 (Akta 342), pekerja asing yang merupakan pemegang Pas Lawatan Kerja Sementara (PLKS) sahaja diwajibkan untuk menjalani ujian saringan COVID-19.

Di bawah Akta 342, pegawai dagang (*expatriate*) tidak diwajibkan untuk menjalani ujian saringan COVID-19. Walau bagaimanapun, mereka adalah layak untuk menjalani ujian saringan COVID-19 di bawah Program Saringan COVID-19 Bagi Pekerja Asing.

6. BAGAIMANAKAH PROGRAM SARINGAN COVID-19 KEPADA PEKERJA ASING INI DILAKSANAKAN?

Ujian saringan dijalankan oleh klinik dan hospital swasta menyertai program ini sebagai panel. Senarai panel yang menawarkan ujian saringan RTK Antigen boleh dirujuk di <https://psp.perkeso.gov.my>. Ujian saringan ini akan menggunakan **kaedah RTK Antigen** yang diluluskan oleh Kementerian Kesihatan Malaysia.

7. ADAKAH PERKESO AKAN MENANGGUNG SEPENUHNYA KOS UJIAN SARINGAN COVID-19?

PERKESO akan membiayai kos bagi kit ujian RTK Antigen sahaja. Majikan perlu membiayai kos perkhidmatan yang dikenakan oleh klinik atau hospital panel.

8. ADAKAH KOS KIT UJIAN BAGI PEKERJA-PEKERJA ASING YANG TIDAK MENCARUM DENGAN PERKESO JUGA AKAN DITANGGUNG OLEH PERKESO?

Bagi pekerja asing yang bukan pencarum PERKESO, kos bagi kit ujian tidak ditanggung oleh PERKESO justeru pihak majikan perlu menanggung sepenuhnya kos saringan yang dijalankan oleh pekerja asing yang tidak mencarum dengan PERKESO.

9. ADAKAH MAJIKAN PERLU MENGHUBUNGI KLINIK ATAU HOSPITAL UNTUK PENETAPAN JADUAL SARINGAN?

Bagi mengelakkan kesesakan semasa saringan, majikan perlu menghubungi klinik atau hospital untuk menetapkan tarikh dan masa saringan. Senarai panel yang boleh menjalankan ujian saringan RTK Antigen boleh dirujuk di Direktori Panel di portal <https://psp.perkeso.gov.my>.

10. ADAKAH SARINGAN BOLEH DIJALANKAN DI PREMIS MAJIKAN?

Majikan boleh berbincang dengan klinik atau hospital yang menawarkan saringan untuk mengetahui sama ada saringan boleh dilakukan di tempat kerja. Kemudahan ini adalah bergantung kepada kapasiti dan kesesuaian serta perlu mematuhi SOP yang telah ditetapkan oleh KKM.

11. ADAKAH MAJIKAN DIBENARKAN UNTUK BEROPERASI SETELAH PEKERJA MENJALANI SARINGAN?

Majikan boleh beroperasi seperti biasa tertakluk kepada arahan lanjut daripada Kementerian Kesihatan Malaysia atau Jabatan Tenaga Kerja berdasarkan **keputusan ujian saringan COVID-19 yang dijalankan.**

12. ADAKAH PEKERJA AKAN MENDAPAT KEPUTUSAN SARINGAN SETELAH MENJALANI SARINGAN?

Klinik atau hospital yang menjalankan saringan akan mengeluarkan keputusan saringan kepada majikan dan pekerja.

13. APAKAH YANG PERLU DILAKUKAN SEKIRANYA PEKERJA ASING BELUM MENDAFTAR ATAU MENCARUM DENGAN PERKESO?

Majikan perlu mendaftarkan pekerja asing sebagai pencarum PERKESO sebelum melayakkan mereka menjalani ujian saringan ini. Bagi pekerja asing yang bukan pencarum PERKESO, kos saringan perlu ditanggung sepenuhnya oleh pihak majikan.

14. APAKAH LANGKAH YANG PERLU DIAMBIL BAGI MENCEGAH JANGKITAN COVID-19 SEWAKTU PROSES UJIAN SARINGAN DIJALANKAN?

Proses menjalani ujian saringan melibatkan ramai pekerja, dan boleh menyebabkan SOP pencegahan Covid-19 seperti penjarakan fizikal terjejas. Oleh itu, pekerja perlu sentiasa mematuhi SOP yang telah ditetapkan sewaktu menjalani ujian. Ujian yang dijalankan di premis majikan juga perlu mematuhi SOP yang telah ditetapkan oleh pihak KKM.

15. BILAKAH PELAKSANAAN PROGRAM SARINGAN COVID-19 KEPADA PEKERJA ASING AKAN DITAMATKAN?

Program ini dijangka tamat apabila situasi semasa penularan COVID-19 dalam kalangan pekerja asing adalah terkawal atau telah dibendung dengan sebaiknya dan juga berdasarkan penilaian risiko oleh Kementerian

Kesihatan Malaysia. Kemudahan ini juga adalah tertakluk kepada sebarang arahan kerajaan berkenaan perkara tersebut.

16. BAGAIMANAKAH PERKESO BOLEH DIHUBUNGI SEKIRANYA TERDAPAT PERTANYAAN LANJUT?

Sekiranya anda mempunyai pertanyaan lanjut, sila hubungi PERKESO melalui talian 03-4264 5089 atau 1-300-22-8000, atau layari Portal PSP di <https://psp.perkeso.gov.my>.